



Inatsisartunut ilaasortaq
Kristian Jeremiassen, Inuit Ataqtigiit

12-08-2022
Suliap normua 2022 - 15915
All. 20875838

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: iian@nanoq.gl
www.naalakkersuisut.gl

§ 37 naapertorlugu isumaginninnermut siunnersortinut piumasaqaatit pillugit apeqqummut nr. 159-2022-mut akissuteqaat

Asasara Kristian Jeremiassen.

Apeqqtinnut qujanaq. Apeqqtigineqartut tullinnguuttuni ataasiakkaarlugit uteqqinneqarput akineqarlutillu.

1. Inunnik Isumaginninnermut Siunnersortit ilinniarsimasut Kommuneni tallimaasuni annertuumik amigaatigineqarneri eqqarsaatigalugit Inunnik Isumaginninnermik Siunnersortit ilinniarsimasut atugarisai Naalakkersuisunit qanoq pittanngorsaavigineqarniarpat?

Akissut: Isumaginninnermut siunnersortinut piumasaqaatit Namminersorlutit Oqartussat kommunillu aamma sulisartut kattuffiat isumaqatigiinniarsinnaatitaasup akornanni isumaqatigiissutigineqarput. Isumaginninnermut siunnersortinut attuumassuteqartut tassaapput Atorfillit Kattuffiat/ AK. Tamatuma sanitigut piumasaqaatinut piviusunut suliffeqarfik ataasiakkaa apeqqutaassaaq. Kommunit ataasiakkaat iluanni suliffeqarfinnut piumasaqaatit piviusut pillugit kommunit isumaginninnermut siunnersortinit suliffigineqarnerusut ukkataqarsinnaassapput. Taamatullu Naalakkersuisut Naalakkersuisoqarfiup ataani suliffeqarfinnut piumasaqaatinut ukkataqarsinnaassallutik.

Ukiorpasuarni isumaginninnermut siunnersortinik ilinniarsimasunik amigaateqartoqartarpoq tamatumunngalu amigaateqarnermut aaqqiisoqarniarluni amerlasuutigut iliuseqartoqartarsimalluni. Isumaginninnermut siunnersortit ilinniartitaanermut malittarisassani aalajangersakkat kingusinnerpaamik 2016-imi nutarterneqarput. Taamatuttaaq suliut isumaginarlugit, taakkua nalinginnaasumik isumaginninnermut siunnersortinit isumagineqartussat, ilinniartitaanermut suliniutinik amerlanerusunik aallartitsisoqarpoq. Assersuutitut taaneqarsinnaavoq siunnersortit assistentiattut ilinniarniq, taanna ingerlatsivinni oqartussaasoqarfinni ilinniarsimanngitsunut atorfilinnut sammitinneqartoq inuusutissarsiummik ilinniarfiusoq. Matumani ilinniartitsineq tunngaviusunik isumaginninnermut tunngasunik ilisimasanik piginnaasanillu pissarsititsissaaq. Siunnersortit assistentit isumaginnittoqarfimmi suliassat, taakkua piginnaasaannut tulluurtuusut isumagisinnaavaat.



Kommunit nammineerlutik isumaginninnermut siunnersortinut ilinniarsimasunut kommuneqarfinni sulinissaannut qinnuteqartikkumallugit pilerinarsaasinnaapput ilitersuinermik siunnersuinermillu, pikkorissartitsinissanut ilinniaqqinnissanullu periarfissanik neqerooruteqarnikkut kiisalu suliaasaqarfirmut isumaginninnermullu tunngatillugu sulinermi avatangiisinut sinaakkutinik pitsaasunik pilersitsinikkut.

2. Inunnik Isumaginninnermut Siunnersortitut ilinniarsimasut pisortat suliffeqarfiutaani soorlu Kommuneni Namminersorlutik Oqartussani atorfillit amerlanerulernissaanut anguniarlugu Naalakkersuisut qanoq pilersaaruteqarpat?

Akissut: Isumaginninnermut siunnersortit ilinniarsimasut amerlisarniarlugit ilinniarnissamut qinnuteqartartut amerlineqarsinnaanerata nalilerneqarsinnaavoq. Ilinniartitaanermut malittarisassani aalajangersakkami atuuttumi allaqqavoq isumaginninnermut siunnersortitut ilinniarnissamut ilinniartunik 20 missaaniittunik ukiumut akuersisarnissamut periarfissaqartoq. Isumaginninnermut siunnersortitut ilinniarsimasuni amerlisaasinnaanissamut tunngaveqarpoq marlunnik. Siullertut tunngaviusoq tassaavoq ilinniartitaanissamut akuerineqarsinnaanissamut isersinnaaneremut piumasaqaatinik ilinnialernissamut qinnuteqartut 20 sinnerlugit naammassinnittuussasut. Aappaattut tunngaviusoq tassaavoq ilinniartunut amerlanerusunut aningaasanut inatsimmut aningaasanik immikkoortitsisoqarnissaa.

Aammattaaq pisortaqaarfinni isumaginninnermut siunnersortitut ilinniarsimasunik amerlisaanissamut apeqqutaavoq namminersortut suliffeqarfiutaanni isumaginninnermut siunnersortitut ilinniarsimasunik pisortaqaarfiit suliffiutaanni atorfininnissamut qinnuteqarusuttunik sulisoqarnerisooq. Namminersortunit sulilersitat isumaginninnermut siunnersortit amerlassusaannik qulaajaasumik misissueratarsinnaasoqarneranut Naalakkersuisut ilisimasaqarfiginngilaat Naalakkersuisut.

3. Naalakkersuisut ilisimavaat Inunnik Isumaginninnermi Siunnersortitut ilinniarsimasut pisortat suliffeqarfiutaani soorlu Kommuneni Namminersorlutillu Oqartussat suliffeqarfiutaani sulileraluaannarlutik allamut suliffissarsiortarnerat sumik tunngaveqarnerisooq?

Misissuisoqarnikuusimappat suummita tunngavilersuutigineqarsimappat pisortat suliffeqarfiutaani Kommuneni Namminersorlutillu Oqartussat suliffeqarfiutaani suliumangittarneranut?

Misissuisoqarnikuunngippat paaserusunnarpoq Naalakkersuisut pilersaaruteqarnerisut ajornartorsiutip misissorneqarnissaanut?

Akissut: Isumaginninnermut siunnersortit suliffimmik toqqaasarnerannik toqqaasannginnerannillu, taavalu atorfinitsitinerit sivilissusaannik suliunnaartarnerannillu peqqutaannik misissuinermik nutaajunerisunik soqanngilaq.

Ukiut arlallit qaangiuttut kommunini tamani meeqqanut tunngasut suliat pillugit misissuinerit takutippaat isumaginnittoqaarfinni isumaginninnermut siunnersortit sulisullu allat amerlasuut suliassanik naammassineqarsimanngitsunik ulikkaartut. Ilaatigut misissuineq tamanna tunngaviusumik naliliivoq kommunini isumaginninnermut siunnersortit sullissisartullu allat sulinerikkut tatisimaneqarnerat annertooruusooq. Tamatuma saniatigut NIISIP (Isumaginninnermi Siunnersortit Peqatigiiffiat) amerlasuutigut erseqqissaatigarsimavaat isumaginninnermut siunnersortit sullivimmi avatangiisaat ilungersunartuugajuttuusoq.



Naalakkersuisut piffissami massakkut misissuinissanik pilersaaruteqanngillat. Naalakkersuisut meeqqanut, inuusuttunut ilaqutariinnullu suliassaqaarfimmut suliniutinik ingerlatanik amerlasuunik naammassinninnissaat ukkataraat. Ilaatigut eqqaaneqarsinnaavoq 2022 ingerlanerani kommunini tamani meeqqanut suliassaqaarfimmi digitalikkut sullissisoqartalissamat. Taamaalilluni isumaginninnermut siunnersortinut meeqqat pillugit suliaqarneranni pingaartumik ikiuuttartussamik sakkussaqaalissaaq.

4. Naalakkersuisut pilersaaruteqarpat Inunnik Isumaginninnermut Siunnersortitut ilinniarsimasut ataavartumik pikkorissartinneqartarnissaanut?

Akissut: Kalaallit Nunaanni meeqqanut inuusuttunullu atugarliortunut pitsaannerusumik suliniuteqarnissaaq pillugu kalaallit qallunaallu oqartussaasoqarfiisa assigiinnigitsunik suliallit akornanni suliaqarneq, 2020-2023-mik atortuulersitsinnermut atatillugu imaqarpoq suliniutit amerlanerusut ilaatigut isumaginninnermut siunnersortinut ilinniarsimasunut pikkorissartitsinerit – Assersuutigalugu kommunini aqutsisunik suleqatigiinnullu aqutsisunik allanngortitsinnermi aqutsinnermut pikkorissartitsisoqarpoq, tassani isumaginninnermut siunnersortinik tapersersuinissaaq salliunneqarluni. Tamatuma saniatigut eqqaaneqarsinnaavoq sullissisunut aqutsisunullu digitalikkut suliassanik suliarinninnissamat atortorissaarummik nutaamik atuinissamat inaarutaasumik atuisunut ilinniartitsineq.

Alla suliniut tassaavoq digitalikkut suliassanik suliarinninnissamat illoqarfiit atassuteqalerpata illoqarfinni ataasiakkaani sanileralugu ilitersuinerit Isumaginninnermut Aqutsisoqarfimmi Task Force-mit isumagineqassasut, taamaalilluni atortorissaarummik suliassaqaarfimmi atuineq teknikikkut atortuulersuisoqarnerani ilinniarnegassamat. Sanileralugu ilitersuineq piviusumik suliassanik suliarinninnermi sullissisartunik ingerlaavartumik malitseqartitsissaaq.

Tamatuma saniatigut FL 2022-mi kontoni pingaarnerni marlunni ilaatigut isumaginninnermut siunnersortinut ilinniarsimasunut pikkorissartitsinissanut aningaasanik immikkoortitsisoqarpoq. Kontomut pingaarnermut 40.91.26 Isumaginninnermut suliassaqaarfimmi ilinniartitaanikkut suliniutinut isumaginninnermut siunnersortit ilinniaqqinnissaannut aningaasanik immikkoortitsisoqarpoq. Kontomi pingaarnermi tassani taamatuttaaq Isumaginninnermi sulinnermi siunnersortitut sulinnermut kiisalu Siunnersortit assistentiattut ilinniarnermut aningaasanik immikkoortitsisoqarpoq.

Kantomut pingaarnermut 30.01.03 Isumaginninnermut pillugu pikkorissartitseqqinnerit ilinniartitseqqinnernullu isumaginninnerup iluani sulisunik ilinniartitsinnermut aningaasanik immikkoortitsisoqarpoq. Ilaatigut eqqaaneqarsinnaavoq ilaqutariinnik siunnersuisoqatigiinnermi, pisortat ingerlatsineranni suliassat suliarineqartarnerat pillugu inatsisit aallaavigalugit suliamik sullissinnermi aamma inuit innarluutillit tapersersorneqarnissaannut inatsimmut ilitersuinnermut neqeroorummi pikkorissartitsisoqarnissaa.

Naggasiullugu ilanngutissavara isumaginninnermut suliassaqaarfimmi pissutsit allat suliani atuuffigisinnaagamikkit suliame avatangiisaallutik suliamilu aaqqissuisuullutik.

Inussiarnersumik inuulluaqqusillunga

Mimi Karlsen